

Weeche dem Outdoor-Park, de zweide Deil

Om Freidaach denooch habb ich de Schorsch unn soi Kättche uffem Markt getroffe unn jeder von dene hadd e Dutt voll Gemies in de Hond. Ich hadd noch nit emol Gude gesacht, doo hott dess Kättche schunn gegauzt: So e bleed Idee. Enn Spillplatz ferr Alde. Ich saach derrs: Moiner geht dort nit hie.

Ich war gonz verschrocke unn habb gefroocht: Ei Kättche, warum dann nit, ess iss joo noch nix von all dem doo, awwer so Tränningsgeräte sinn doch gut ferr die Kondition, doo kennte merr dann im Nu de Gadde umgrawe unn ihr Mädcher misst uns nit immer mett Pferdesalb oischmiern weil unser Kreiz so weh dut.

Dess Kättche hott ihr Dutt uff de Boddem gestellt, unn hott gebellt: Ja, de-erst habb ich gedenkt, dess isse gonz gut Idee von dere SPD. Weil moin Schorsch werkdaachs immer dehoom erumsitzt odder mir in de Fieß erum lääft, wie vor korzem wie ich Marmelad gekocht habb unn mettem Oimachglas in de Hond iwwern gestolwert bin. Doo hätt ich merr vorstelle kenne, dass ich gesacht hätt: Ruf doi Kumpels oo unn mach dich fort, macht eich ab uff de Spillplatz. Awwer dann iss merr was oigefalle unn von doo ab war Schluss: Nix gibt's, de Schorsch gieht merr nit uff den Spillplatz. Männer die verheirat sinn gehn dort nit hie, aach du, Honnes, sollst ewegbleiwe.

Warum dess?, habb ich gefroocht. Loss uns doch uff den Sportplatz, wenn der mol doo wär.

Dess Kättche druff: Naa, dess kimmt iwwerhaupt nit in Frooch. Dess iss aach koon Sportplatz, dess iss enn Spillplatz. Soll ich derr verzähle wies dort vor sich gieht?

Ich saach: Ei ja, erzähl merrs emol

Doo sächt se: Also ihr glaabt doch nit dass dort nor Männer spille. Dess dauert nit long unn enn Stall von Wittweiwer mächt doo erum. Unn die erst die debei iss dess iss unser Nochbern, die Seechern.

Wasde nor immer mett de Frau Seecher host, hott de Schorsch gemurmelt, unn schwupp, hottems Kättche onns Boo getrete.

Dann machtse weider: Also gut, ich saachs eich. Wenn ihr die Spillgeräte ...

Ich habb mich getraut ze saache: Sportgeräte, Kättche.

... die Spillgräte dorchgemacht habbt, werrder eich uff oo von dene Bänk setze. Uff oomol kimmt dann die Seechern dezu ... ja, ich saach die Seechern, weil die grad die Woch widder mettem Schorsch oobännele wollt. Hottse doch iwwer de Gaddezaun zum Schorsch gesaat – unn die schämt sich nit, ob ich denewer stieh odder nit –, obber mol mett e bissi Werkzeug zu err kumme kennt, ihr Wasser det nit ablaafe.

Doo häsde mich emol kreische heern kenne. Waach dich, Schorsch, habb ich gekrische, wenn dere ihr Wasser nit ablaafe dut, dann soll se zum Uroloche gieht, der iss ferr so was zustännisch. Ich kann merr aach denke wasde ferr Werkzeug mettbrenge sollst, dehomm isses kaputt, awwer auswärts wärs im Nu widder gonz. Nix gibt's. Wennde doohie gieht, dann loss ich mich von derr scheid, habb ich gekrische. Doch aach so e Schnätter wies Kättche muss ab unn zu emol Luft holle, unn doo habb gemoont: Der Platz iss doch mitte in de Stadt, was sollen doo schunn bassiern?

Awwers Kättche war sofort widder voll doo. Unn jetz saach ich derr, warum ich den Schorsch nit uff de Spillplatz losse. Wenn ihr uff de Bonk sitzt, kimmt die Seechern unn setzt sich newern Schorsch. Die hott dann enge Dschiens oo unn e Blus, in die de weit enoi gucke konnst, unn dann greift se in ihrn Hosesäckel, hollt ihr Händy eraus un sächt

zum Schorsch, ob er ihr mol helfe kennt, weil uff dem Händy wär so e Mehl, doo kennt se nix demett oofonge. Unn dann gibtse dem Schorsch dess Händy in die Hond unn lässt noch e bissi ihr foine Fingerscher droo.

Die hott wirklich foine Fingerscher, hott de Schorsch gesaat, unn schwupp, hottems Kättche ons onnern Boo getrete.

Dann hottse weider gemacht. Die Seechern hott joo aach noch nie was geschafft. Iwwerichens - wo host du dann dere ihr Finger geseh? Odder die Dinger wo de dich druffstelle dust unn owachtbasse musst dassde nit erunnerfällst, die ferrs Gleichgewicht, doo seh ich schunn jetz die Seechern drufferummache unn heer se kreische vor Jux unn Dollerei unn de Schorsch, der ahle Depp, gieht hie unn hält ihrs Händche: Basse se uff, Frau Seecher, dass nit erunnerfalle unn sich beim Absteihe nit verknaxe, es wär doch schad um so scheene Boo! Unn die sächt: Ach Herr Nachbar, sagen Sie doch Gisela zu mir! So werrd dess, ihr Männer, so unn nit onnerst. Weil uff so enn Platz gehn de erst so e paar Dolle wie moin Schorsch unn soi zwaa Stommdischbrieder, awwer schunn bald die Flerschemer Wittweiwer unn die Flerschemer Wittwer. Weil ich moon, doo det nit nor gespillt werrn, der Platz wär aach ferrs Oobännele von Leit gut, die dess bis doohie uffem Kerchhof gemacht hawwe, so wies sellemols schunn de Jochen Kunz zum Beste gewwe hott, die Sach mette Zott nooch vorne unn so.

Jetzt verlierde awwer die Fassong, habb ich mich getraut ze saache.

Ess Kättche iss alls lauder worrn. Dess kimmt so, glaabt merrs, ihr ahle Simpel. Weil de Schorsch hott merr verzählt, uff so emm Spillplatz gebs aach was, doo misst merr uffem Boddem so Stoo in Figurn oisetze. Moont ooner von eich, ihr det dess mache? Naa, dess werrd nor von Fraue gemacht, weil die Männer eher Baumstämm stemme dun. Stellt eich dess vor: Wittweiwer bigge sich unn leeche Stooscher in so Figurn!

Die war so in Form, dess Kättche, dass uns dess vorgemacht hott. E bissi peinlich wars emm Schorsch awwer doch, wie soi Fraa ihrn dicke Hinnern in die Luft gestreckt unn im Bigge noch gerufe hott: Ei dess iss dann grad wie uffem Kerchhof, wo die Wittweiwer sich so bigge misse wennse uffem Grab von ihm Monn häckele, wie uffem Kerchhof iss dess, weil grad dess Bigge die Männer dezu bringe dut ...

Langsam hottse sich widder grad gestellt unn geschnauft: ... selbst enner trauernde Witwe oozebiete, sich soi Briefmarkesommlung oozegucke odder zum Sektfriehstick ze kumme. Weil schunn moncher Monn gedenkt hott, wenn ich die doo vorne nit gleich erumkrieh, dann schaffts der Olwel doo hinne, der iss long nit so gut druff wie ich, awwer der guckt aach schunn die gonz Zeit nooch dere ihm Gehäckel.

Dann isses Kättche e bissi leiser worrn. So was iss uff dem Seniore-Spillplatz dann wenicher pietätlos, dess iss alles e bissi lockerer unn alles gieht e bissi schneller. Unn dann hott merr aach bald enn Uznome ferr den Platz: Frau-Holle-Platz!

Frau-Holle-Platz? – ei warum donn dess, habb ich gefroocht.

Ja, Frau-Holle-Platz. Weil wenn dess so kimmt wie ichs gesaat habb merr schunn bald von weidem heern kann wie irchendwo in emm halbleere Haus die Bettdecke geschittelt werrn. Also wennse wirklich kumme, die Spillgeräte, moin Schorsch gieht nit dort hie!

Unn dann hotts Kättche ihr Dutt vom Boddem uffgehowwe unn hott mich nochemol schepp oogeguckt, de Schorsch hott mett de Achsele gezuckt als wollder saache: Was soll ich dann mache, unn dann sinnse fort unn hawwe mich allons gelosse.

Schad, habb ich gedenkt, die Idee mett dene Sportgeräte ferr Seniors iss doch wirklich gut. Awwer gonz egal wer was heit mache will, obs ooner allons iss odder e Partei, immer gibtsere, die degeeche sinn, unn meisdens mett de faulsde Argumente.

Eiern Honnes